

DIALECTBIJDRAGE APRIL 2009

Regelmoedig presentere vieër os “Bie Wieze Van Sjpreëke”, in de Trompetter. Vier nuëdige jieëdereë oet om hie aan deel te numme. Doer ´n sjtukske te sjrieve en noa onge sjfond e-mail adres te sjikke, of om ´ns langs te komme op een van os oavende; de 2^e moandig van de moand om 20.00 oer Schoolstraat 4 in Broenssem.

Mieng Jeug

Doa woa mieng ouwesjhoes nog sjteet
Deelde ich mit broar, leef en leed
Hont der pap en de mam, daag en nach
Os mit de nuëdige zurg groeët gebrach
Eëpel en alle greunte houwe vier in d'r gaat
En sjpilde in d'r hof, of ´t druug woar of naat
Huvelle, mit de tol sjpiele en belke trekke
Wat woare die luuj um te verekke
Bei der Neut op de trepkes zitte
Achter der Zeele van Schaik, sente sjtikke
Bei d'r Kessels Roos ruuke aan ´t broeëd
En op d'r Sittarderweg bleef ´t jungske Verwer doeëd
En gong mit ing reep en heutje uëver gen sjtroate
Of d'r winkvoeëgel oplate
En oet d'r zomp waterhónder en negerpie..... verkope
Sjlegter Gorisse houw ee verke gesjlag
De wiesvrouw “Unger”houw ee kink gebrag
En vier holde bei Collaris de waar
En kleen Niekske rökde in ´t portaal ing dieke sigaar
Vuur ée kwartje ing tuut friete bei d'r Hermans Huub kope
En dan mit de jonge noa d'r zankberg lope

Jan Halmans

Luuj mit kritiek

In os leëve,
Dat is ´n gegeëve.
Hubbe altied luuj kritiek,
Dat is neet ummer eëve sjiek!

Vuural bie die luuj die alleen langs de kantj sjtoan,
En teëge alles wat angere doeën in goan!
Déks dont ze die kritiek ooch noch neet zelf bringe,
Mér probere ze doa vuur inne angere gek te vinge!

Want sjtil dich vuur dat ze dat zelf motte doeën,
Dan sjrieie ze meteen moord en brandj mit de hoeëgste toeën!
Want ze hubbe déks ´t wirke zelf neet oetvonge,
En bie de geboorte alleen ´n groeëte moel bedonge!

´n Ege mening hubbe ze ooch déks neet,
Omdat aansjlete bie de groeëte groep zoeë gemakkelijk geet!
Ze drieve waal ummer mit angere de sjpot,
Make doomit succesvolle trajecte kapot!

't Ligkt bie die luuj dan ooch neet direct vuur de handj,
Te dinke dat ze gezeëgende zunt mit veuël versjtandj!
En ooch excuses komme in hun woeërdebook neet vuur,
De wuërd respek en waardering make hun uëversjtuur!

Jieëdereë kint ze waal die luuj, ze lope uëveral rondj,
En trappe dich de been weg onger de grondj!
Zeët dich dit nieks, houd dich dan d'r sjpeegel vuur,
En bekint went 't zun mot kluër!
Want dan is dich dit gedich op 't lief gesjrieëve,
En is het zieëker dat dit neet zoeë kint blieve!
Want vreug of laat kumt toch alles oet, zoeë veuël is gewis,
En dan zal-ste zieën dat-ste zelf de gebieëte hondj bis!

Ron Logister.

Ziewind

Ich fiets neet mieë, ne, ich bin gesjtópt, miene renfiets hób ich aan inne nagel gehange, in d'r sjtal.
Piejeerke fietst waal nog...nog ummer.
Piejeerke fietste vöal, same mit mich, mar noe dus solo.
Heë hat óch ummer good ópgelet, hieël good gekieëke wie inne èchte fietsrenner drónk oet ziene bidon
en wie deë d'r zelfde bidon uëver ziene besjwitte kop leet leëglope.
Heë wós genouw wie't mós wen heë módderzieëlalling uëver de sjmale peëdjes van de
Broenssemerhei fietste.
Prachtig vóng heë 't óch wie de echte renners mit-ee kommuniseerde.
Kót-aaf en vanoet sjuunse oogópsjlaag.
Óch sjpuie, soms rech in de lens van de camera, dat is zuvere techniek !
Winne doog Piejeerke bouw ummer doa in de Hei.
Es gee miensj te zieë woar trók Piejeerke ziene supersjprint aan, wón ummer mit ing banddiekte van ing
ónzichtbaar peleton en góng dan rechóp zien fiets sjtoan, wórp de erm ómhoeëg en zjweide noa de
dinkbildige toesjouwere die sjtóngte te jüche vuur Piejeerke.
Deë sjlaag deë Piejeerke vurig joar vol op zoeë ing sjmaal peëdje in de Broenssemerhei, deë sjlaag,
doa wil heë noeëts mieë aan trükdinke.
Op d'r televies houw heë gezieë wie inge fietsrenner ónger 't fietse pise.
Dat ritueel begós ummer op inge sjtille weëg mit 't ómhoeëg sjuve van ing bóksjepiep.
Mit mar ee hand aan 't sjtuur en mit de angere hand prebere d'r piemel in de gouw richting te haote.
Haof zittend, haof sjtoand op de pedale prebeerde heë zieweeëds zieng bloas leëg te loate lope
Heë houw 't allemoal gezieë op de televies en prebeerde 't noe óch
Joamer genóg houw heë ging reëkening gehaote mit inge sjtevige ziewind ,en tot uëvermoat va ramp
kreeg heë zieng bóksjepiep neet hoeëg genóg opgesjtrup.
Wat 'em toen uëverkoam doog 'em trükdinke aan de tied van d'r geknupde luier.
Heë prebeerde nog te redde wat d'r te redde vol mar rakde 't sjpoor gans kwiet wie heë in ing aod
karresjpoor terech koam.
Piejeerke makde inne doebele salto mortale wie inne sirkesartiëst.
Inge groeëte, eezame kampioën loog neëve ziene renfiets, in de nate berm van 't sjmale zandpeëdje,
óngerwiel heë bezig woar in zieng boksj te zeke.
Piejeerke uëverweëgd noe nog ummer of heë sjtópt mit fietsrenne.
Es kómpensatie hat heë zich alvas inne trekzak gekoch.
Doa kin nieks mis mit goan, neet op de Broenssemerhei, óch neet op sjmale peëdjes en óch neet bie
helle ziewind...!

Duur jonge

Mit vergadere en kalle
zunt vier veuël oeëre kwiet
der wurdt gebrazeld
in deë kosbare tied

Hoe van op 'n anger manneer
jieëmere es de pest
Es ene erme jong 'ns
effe oppe sjtieël rest

Mer 150 euro of mieër
per oeër in de tesj loate tinkele
Die al beginne te tillen
went der wikker begint te rinkele

wat dinke die waal?
dinke die vier zint onneuzel?
Daag en daag lank
gemoel en gebreuzel

Achteraaf dan nog
ene borrel en 'n hepke
zoeë houte ze os allemoal
'n bietje veur 't lepke
Wiel Roeselers

Noaberkat

Doa kunt Pako alwer gesjtrieëke
Wat heë mot, zal waal nog blieke
Köpkes geëve
Alzeleëve
Leef, va köpke bis stats
Mit zie sspinne, oapend heë os hats

Köpkes geëve
Alzeleëve
Kump ze get leefde bezurge
En dat jieëker murge
Leef, va köpke bis sjtats
En da geet heë werum op jats
Jan Halmans

Probleme zunt oetdaginge

Vieër kinne geen probleme, alleen oetdaginge,
Die déks 't gevolg zunt van miensjelicke dwalinge!
Alleen weë die oetdaginge aan durf te goan,
Kriet gans get in 't leëve gedoan!

Ron Logister.

De daag

Módderdaag, vadderdaag,
Valentijn en deredaag,
Sinterkloas en Krismes,
geld verdene...bizzenis...

Gówwwe daag vuur de blómmiste
bekkere,sjlieters en drogiste,
welk fes d'r óch is,
geld verdene...bizzenis...

De ganse kroam van winkelere
wille dat vier fester viere,
ze wille bótter bei de vusj,
geld verdene...bizzenis...

Wat die dan in 'n paar weëke,
in hun depe tesje sjteëke,
dat is ech gee kattepis,
geld verdene...bizzenis.

Keuk, vla's ,vuurwerk en blómme,
't kan hun allemoal nieks verdómme.
Óch al ruukt 't neet ummer frisj...
Geld verdene...bizzenis...

Dat is neet mien disipliene
Of mót ich óch "zjwat" beiverdene ?
óch wen 't verboane is ?
Geld verdene...bizzenis...!

Thei Janssen†

Der Zenger

Op 'n sjiefke, zilver, rondj
Huër ich de sjoeëne klanke
En zien de zenger in volle gloarie
Op de buun in mien gedanke
Zien sjtum, zien timbre
Zien geveulige melodieje
Huër ich onaaftgebroake
Langs mien oeëre glije
Ich geneet, soms hub ich
't Zelfs sjoeverechtig
Deë zank, die klanke
't Wurd mich soms te mechtig
't Wonjer van die prachtige sjtum
Zoeë puur en onverdorve
Wiel der zenger, ocherm
Veuël te jonk is gesjtorve

Wiel Roeslers

Os Limburg

Vier hant gezonge, wie sjoeën os Limburg is
Mar allewiels geet 't ee en anger noa de verdommenis
Ich han 't getekend, de landsjappelijke prach
't weëd noe ordentlig verkrach

Vier make gedichsjkes uëver beëksjkes gans kloar
Mar allewiels had och der vusj 't zijwoar
Wat hant vier gesjtuud uëver ozze gronk
Noe sjtinkt 't, noa zeek en sjtronk

Vier hant gesjtuud uëver os huëvele en daler
Mar allwiels huusj te AWACS-sjandaler
Noe weëde de beum umgehouwe
Um die sjtinkende kloemele i gen loch te houwe

Limburger blief tekene, dichte en zinge
Mar ins hilt 't op
Dan treks doe die dieke plank va diene kop
En dingks te a dieng noakommeling!
Jan Halmans

Profitere van Angere

't Is neet woar, 't is neet woar,
Ich houw toch gaar geen bezjwoar,
Zoeë huurs-te luuj ummer zigke,
Went ze urges teëge woare dat good is gegange.
Mér diezelfde luuj loate dich volledig hange,
Es 't neet good ging en doe dus get has oet te ligke!
Ze wille alleen profiterere van dien goeije dinger,
Mér angesj weëre ze net kleen kinger!

Bedink dich dat alleen profiterere van angere,
Hieël veuël zeët uëver diene ege ich!
Dan zal-ste zelf noeëts verbeëtere of verangere!
En gees-te nog déks genug op dien gezicht!

Es-te dat wils vuurkomme zal-ste motte lieëre,
Same mit angere te kinne wirke en verkieëre!
Doe zals zieën dat 't dich dan good zal lukke,
De vruchte van goeije ideeën te plukke!

Ron Logister.

Die groeëte hank

Es klinge jóng al góng ich döks
mit Pap mit, aan zieng groeëte hank
v'r lepe same durch d'r busj,
jieëkere sjtroek en boom woar ós bekank,
Ich veulde mich dan inne ganse keeël,

wen ich zoeë mit moch goa,
mie henke pasde kaom,
mar die hank woar ummer doa,
die woar zoeë groeët en sjterk.
Die hank kós alles aa,
die zörgde vuur ós allemoal,
bei ós toes en op 't werk,
die hank die mich vertrouwe goof,
want die hank die woar van uch,
die mich óch zieëkerheid goof,
en doavuur dank ich uch.

Thei Janssen†

't Geet gebuëre

Ich zieën wie vuurzichtig
De ieësjte blumkes bluije
Graas en ooch kroed
Sjtillekes aa begint te gruije
Wie bleke geële sjtroale
Van de vuurjoarszon
Langzaam werme
De rododendron
'n vuëgelke bontj
Van kluëre
Liet vuurzichtig
Zien leedje huëre
Krek esof 'tzigke wilt:
"Noe geet 't gebuëre!"

Wiel Roeselers

Vuurjoar

't is vuurjoar va 2009
En vier zitte boete op de bank
En dont de oge touw
Vier loestere noa de vuëgel gezank
Dat is 't leëve
En mit ee teske kaffe va de vrouw
Es vier 't mage beleëve
Da kunt d'r zoeëmer gauw
Noe sjtont vier op en gunt noa binne
Want der kruupt ee wólksjke vuur de zon

Jan Halmans

Same Sjterk

Same sjtont vieër sjterk,
En kinne vieër irges vuur goan.
Same mieër mans,
Griep in 't leëve die kans,
Dan kriege vieër same veuël gedoan,
En kinne vieër vol vruijd in 't leëve sjtoan!

Ron Logister.

Doevesoep

inne Broenssemse doevepiet,
woar ing van zieng betste doeve kwiet,
heë zag teëge zieng vrouw,
ich goan ins kieke bei d'r Joep,
en wat zoog heë doa ligke in de soep?
Ing minuut sjpieëder
woar d'r joep twieë teng kwiet.

Thei Janssen†

Windj

Zef oet Heële hau veuël windj
Mar dat hau heë al es kindj
En wienieë hau heë 't ech good d'r op?
Dat is noaë ene keëtel ertesop.
Dan sjaamst du dich mit heum kapot
Dan blieëst heë 't Wilhelmus mit de vot

Wiel Roeselers

Oetsjproak

Doe kins huj-ze-daags beëter ingelsje onzin oetkroame es in 't plat geliek hubbe.

Wiel Roeselers

Bie wieze van sjpreëke

Deë is der duvel van de sjup aaf gesjpronge
Loeës hoonder ligke ooch waal 'ns in de nieëtele
Ene kalderjan, ene moelejan of ene breuzeleer

Hij is erg ziek geweest
Ook slimme mensen maken wel eens blunders
3 Aanduidingen voor een praatjesmaker

Heemkunde ver. Bron v. Brunsham: Schubertstraat 6 6444 BB Brunssum (secretaris@heemkundebrunssum.nl)

Dialectgroep: Folkloriada 15 6441 DW Brunssum (w.roeselers@hetnet.nl)

Website : www.heemkundebrunssum.nl
